

## ՊԱՇՏՈՆԱԿԱՆ ԸՆԴԴԻՄԱԽՈՍԻ ԿԱՐԾԻՔ

Անուշ Բարսեղի Բարսեղյանի «Վերին շնչուղիների սուր ռեսպիրատոր վարակների և գլխացավի ախտանիշների ինքնաբուժման համուղղումը դեղատանը» թեմայով ԺԵ.00.01 «Դեղագիտություն» մասնագիտությամբ դեղագործական գիտությունների թեկնածուի գիտական աստիճանի հայցման ատենախոսության վերաբերյալ

Ինքնաբուժումը անխուսափելի և տարածված պրակտիկա է ամբողջ աշխարհում: Թեև այն հանրային առողջապահության կազմակերպման տեսանկյունից ունի դրական դեր, սակայն ուղեկցվում է մի շարք վտանգներով, ընդ որում ոչ միայն անհատի, այլ նաև ընդհանուր առողջապահական համակարգի համար:

Հատկապես զարգացող երկրների առողջապահական համակարգերի հիմնախնդիրներից մեկն է հանդիսանում ինքնաբուժմամբ պայմանավորված վտանգների կառավարումը: Այդ նպատակով իրականացվում են բազմակողմանի միջոցառումներ, այդ թվում՝ փորձ է արվում բարձրացնել հասարակության ընդհանուր իրազեկվածությունը ինքնաբուժման սկզբունքների, դրա սահմանների և հավանական վտանգների վերաբերյալ: Ամբողջ աշխարհում, հասարակության իրազեկման, ինչպես նաև բուժառուների ինքնաբուժման ուղղորդման գործում յուրահատուկ տեղ է զբաղեցնում դեղատնային օղակը:

Անուշ Բարսեղյանի աշխատանքը, ինքնաբուժման վերաբերյալ Հայաստանի Հանրապետության ազգաբնակչության իրազեկվածության բարձրացմանը և ինքնաբուժման ուղղորդման հարցում դեղատնային օղակի ներգրավվածության մեծացմանը ուղղված աշխատանքների կարևոր մաս է կազմում:

Հետազոտության ընթացքում գնահատվել է վերին շնչուղիների սուր վարակների և գլխացավերի դեպքում ինքնաբուժման տարածվածությունը, դրանով պայմանավորված վտանգների կառավարման մակարդակը, ինչպես նաև ինքնաբուժման ուղղորդման գործում դեղատնային օղակի մասնագետ խորհրդատուների պատրաստվածությունը և ներգրավվածությունը:

Հետազոտողը հիմնավորել է թեմայի արդիականությունը, հստակ ձևակերպել է աշխատանքի նպատակը, խնդիրները, մատնանշել է ստացված արդյունքների գիտական նորույթը և կիրառական նշանակությունը:

Հետազոտությունն իրականացվել է հատույթային ձևաչափով, այն ներառել է քանակական և որակական մեթոդներ: Քանակական փուլում անցկացվել է հարցաթերթիկային հարցում՝ 1308 բուժառուների և 597 դեղատան աշխատակիցների շրջանում՝ պատահական ընտրությամբ: Ընտրանքի ծավալը հաշվարկվել է Կոքրանի բանաձևով, հիմք ընդունելով Հայաստանի Հանրապետության մարդաքանակը և Երևան քաղաքի դեղատների քանակը: Որակական փուլում կազմակերպվել են 6 ֆոկուս խմբեր՝ տարիքային, սեռային, կրթական և բնակավայրային տարաբնույթ կազմով, ընդհանուր 60 մասնակցով: Մասնակիցների և ֆոկուս խմբերի թիվը որոշվել է ֆոկուս խմբերի մեթոդաբանության ուսումնասիրության հիման վրա:

Իրականացվել է հավաքագրված տվյալների բազմակողմանի վերլուծություն, որը թույլ է տվել ոչ միայն բացահայտել ինքնաբուժման տարածվածությունը, այլև խորությամբ հասկանալ այն սոցիալական, մշակութային և առողջապահական գործոնները, որոնք պայմանավորում են այդ վարքագիծը: Տվյալների վերլուծությամբ ստացվել է բավականին մտահոգիչ պատկեր և՛ ինքնաբուժման սկզբունքների, դրա սահմանների և հավանական վտանգների վերաբերյալ բուժառուների գիտելիքների, և՛ դեղատնային օղակի մասնագետ խորհրդատուների պատրաստվածության և ներգրավվածության հարցերում:

Արձանագրված արդյունքները, միանգամայն հիմնավորել են հետազոտողի կողմից, որպես հետազոտության խնդիր սահմանված, ինքնաբուժման գործընթացի համուղղմանը և ոչ ադեկվատ ինքնաբուժման անցանկալի հետևանքների նվազմանը ուղղված միջոցառումների և ծրագրերի մշակման անհրաժեշտությունը և կարևորությունը:

Հետազոտության շրջանակներում մշակվել է սպառողների համար նախատեսված տեղեկատվական ուղեցույց՝ ուղղված ինքնաբուժման գործընթացի պատշաճ և պատասխանատու կազմակերպմանը: Հարկ է նշել, որ հետազոտողի կողմից ուղեցույցի

կիրառելիության և արդյունավետության գնահատման նպատակով իրականացվել է պիլոտային փորձարկում՝ 60 մասնակցի ներգրավմամբ:

Ստացված արդյունքները վկայում են, որ նմանօրինակ տեղեկատվական նյութերի մշակումը և տարածումը կարող են նպաստել հանրության շրջանում պատասխանատու ինքնաբուժման մշակույթի ձևավորմանը:

Ատենախոսության եզրակացությունները և դրանց հիման վրա ձևակերպված առաջարկությունները հիմնավորված են և լիովին համապատասխանում են հետազոտական նյութին:

Ատենախոսությունում ներկայացված գիտական արդյունքները բնութագրվում են արդիականությամբ և կիրառելիությամբ: Դրանք արտացոլվել են հեղինակավոր տեղական և միջազգային գիտական հանդեսներում հրապարակված 10 գիտական հոդվածներում:

Ընդհանուր առմամբ բարձր գնահատելով ատենախոսությունը, այնուամենայնիվ հարկ են համարում նշել որոշ նկատառումներ, որոնք սակայն չեն նսեմացնում աշխատանքի արժեքը, կարևորությունը և նշանակությունը.

- Ցանկալի կլիներ խուսափել «դեղատան աշխատող» ձևակերպումից, կիրառելով դեղատանը աշխատող դեղագետի կամ դեղագործի դերը ընդգծող ձևակերպում,
- Ազգաբնակչության շրջանում հարցումներն իրականացվել են ՀՀ տարբեր մարզերում, մինչդեռ դեղատնային օղակում հարցումները իրականացվել են միայն Երևան քաղաքում: Մարզերում ինքնաբուժմամբ պայմանավորված վտանգների ամբողջական վերլուծության համար ցանկալի կլիներ ընդգրկել նաև մարզերի դեղատնային օղակները,
- Նկատվում են առանձին անհաջող արտահայտություններ, ինչպես նաև որոշ խմբագրական թերություններ:

Բերված թերությունները կրում են խմբագրական բնույթ և ոչ մի կերպ չեն կարող ազդել աշխատանքի դրական գնահատականի վրա:

Ելնելով վերոնշյալից գտնում են, որ Անուշ Բարսեղի Բարսեղյանի «Վերին շնչուղիների սուր ռեսպիրատոր վարակների և գլխացավի ախտանիշների ինքնաբուժման համուղղումը

դեղատանը» թեմայով դեղագործական թեկնածուի գիտական աստիճանի հայցման ատենախոսությունը ինքնուրույն, ավարտուն, արդիական թեմայով իրականացված գիտական աշխատանք է: Աշխատանքը հիմնված է մեթոդաբանորեն ճշգրիտ ուրվագծված նպատակի, հետազոտման ժամանակակից եղանակների և վիճակագրորեն հավաստի տվյալների վրա:

Ատենախոսությունը համապատասխանում է ՀՀ ԲՈԿ-ի կողմից թեկնածուական ատենախոսություններին ներկայացված պահանջներին, իսկ հեղինակը լիովին արժանի է ԺԵ.00.01 «Դեղագիտություն» մասնագիտությամբ դեղագործական գիտությունների թեկնածուի գիտական աստիճանի շնորհմանը:

Պաշտոնական ընդդիմախոս,

Մ. Հերացու անվան ԵՊԲՀ,

Ֆարմակոլոգիայի ամբիոնի ավագ դասախոս,

դեղագործական գիտությունների թեկնածու՝



Ս.Տ. Քարամյան

Ս.Տ. Քարամյանի ստորագրությունը  
հաստատում եմ, Մ. Հերացու անվան  
ԵՊԲՀ գիտական քարտուղար, բ.գ.դ.



պրոֆ Տ.Գ. Ավագյան

12.06.2025